

**Malaysia Perbaiki Kedudukan Dalam Senarai Pemerdagangan Manusia AS -
Sumber
MStar
9 Julai 2015**

WASHINGTON: Amerika Syarikat (AS) memperbaiki kedudukan Malaysia yang menduduki paras terendah dalam senarai negara hab penyeludupan manusia, menurut beberapa sumber Jabatan Negara, Khamis.

Tindakan itu dilihat bakal melancarkan perjanjian perdagangan bebas yang diterajui AS bersama negara Asia Tenggara itu dan 11 negara lain.

Malaysia dinaik taraf ke dalam Senarai Pemerhatian Baris 2 sekali gus melenyapkan halangan utama kepada perjanjian global yang diusahakan oleh Presiden AS, Barack Obama.

Peningkatan itu susulan penelitian antarabangsa berhubung usaha Malaysia memerangi aktiviti penyeludupan manusia selepas penemuan beberapa kubur besar di kem-kem penyeludupan manusia di utara Malaysia, dekat sempadan Thailand.

Tahun lalu, Jabatan Negara AS menurunkan kedudukan Malaysia ke paras terendah Baris 3, sebaris dengan Korea Utara, Syria dan Zimbabwe dengan alasan negara berkenaan kurang bersungguh menangani masalah tersebut.

Namun, sumber Kongres yang mengetahui keputusan itu memaklumkan kepada agensi berita Reuters bahawa Washington telah meluluskan status baharu tersebut.

Ia turut disahkan oleh sumber kedua yang arif berhubung perkara itu.

Sebelum ini, beberapa wakil rakyat dan kumpulan hak asasi manusia di AS menjangkakan Malaysia kekal pada tahap terendah senarai sama tahun ini.

Jabatan Negara AS dijangka mengeluarkan laporan penuh senarai berkenaan pada minggu hadapan.

Hakcipta Terpelihara © 2015 Star Publications (M) Bhd (Co No 10894-D)

Source: <http://www.mstar.com.my/berita/berita-semasa/2015/07/09/malaysia-perbaiki-kedudukan/>